

Ilinniagaqarnersiutit pillugit Inatsisartut Peqqussutissaattut siunnersuut
(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Saqqummiussineq.

Siullermeerneqarnera.

Ilinniagaqarnersiutit pillugit Inatsisartut Peqqussutissaattut siunnersuut Naalakkersuisut matumuuna saqqummiuppaat.

Ilinniagaqarnersiutit pillugit Inatsisartut Peqqussutissaattut siunnersuutip suliarineqarnerani pingaarnertut "Ilinniagaqarnersiutinik Iluarsaaqqinneq pillugu Nassiuaat" tunngavigineqarpoq. Siunnersuut Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqaarfimmit majimi 2002 suliarineqarpoq. Nassiuaat suliarineqarpoq suleqatigiissitap Pisortaqaarfimmit, Ilinniagaqarnersiutinik Allattoqaarfimmit, Aningaasaqarnermut Pisortaqaarfimmit aammalu ilinniagaqartut kattuffiinit ilaasortaaffigineqartup suliaa tunngavigalugu. Siunnersuummut tunuliaqutit aammalu nassuiaammi inassuteqaatinik itisiliinerit pillugit siunnersuummi oqaaseqaatit nalinginnaasut innersuussutigineqarput.

Siunnersuutigineqarpoq ilinniagaqarnersiutit pillugit aaqqiissuussinerup maannakkut atuuttup nutarterneqarnissaa. Qulliunerusumik isigalugu pisariillisaanissaq siunnersuutigineqarpoq. Taassuma saniatigut pingaarnerusutut anguniagaavoq ilinniagaqartut ilinniarnerminnik ingerlatsinerminni kiisalu aningaasanik tunniunneqartunik atuinerminni akisussaaffeqarnerulernissaat.

Nutarterinermi qulliunerusumik anguniakkat tunngavigalugit siunnersuutigineqarpoq klippekortsystemimik taaneqartartup atorneqalernissaa. Taanna imatut isumaqarpoq ilinniagaqartut ilinniakkat pisinnaasaqartitsilersut ingerlannissaannut tapiissutinut qiorsinernik aalajangersimasunik amerlassuilinnik tunineqartassasut.

Taassuma saniatigut immikkut tapiissutit arlallit atorunnaarsinneqassapput taakkunungalugu taarsiullugu ilinniagaqarnersiutit aammalu qaffasinnerusunik ilinniagaqartut aningaasanik atorsinnaaneritut periarfissat qaffanneqartussaapput. Aammattaaq taaneqassaaq siunnersuutigineqartoq ilinniagaqarnissamut piareersarluni atuarnermi atuartut ilinniagaqarnersiutaat annertuumik allangortinneqartussaammata. Allanguutit taakku 2005-imut aningaasanut

inatsimmut siunnersuummiipput aammalu ilinniagaqarnersiutit pillugit nalunaarutip atuuttup nutarternerani ilan-ngunneqartussaallutik.

Ilinniagaqartut kattuffii aningaasat atorneqarsinnaasut ilinniagaqarnersiutillu annertussusaasa aningaasanut inatsimmi aalajangersarneqarnissaannut peqataanissaat qulakkeerniarlugu siunnersuutigineqarpoq Naalakkersuisut ilinniagaqartullu kattuffii taakku pillugit isumasioqatigiissasut. Naalakkersuisut ilimagaat taamaaliornikkut ilinniagaqartut kattuffiinik suleqateqarneq nukittorsarneqassasoq. Taamaaliornikkut ilinniagaqartut kattuffii ilaasortamik soqutigisaannik aallussinissamut pitsaannerusumik periarfissinneqassapput aammalu tassunga ilaliullugu qulakkeerneqassalluni aningaasanik qaqugukkulluunniit tullerissaannerni ilinniagaqartut namminneq siunnersuutaasa aallaavigineqartarnissaat.

Siunnersuut suliamut soqutigisaqartunut tusarniaassutigineqarpoq. Tusarniaanermi akissutit siunnersuutip tassungalu oqaaseqaatit ataasiakkaatigut allangortinneqarnerannik kinguneqarpoq. Aammattaaq siunnersuummut oqaaseqaatini tusarniaanermi akissutini oqaaseqaatit pingaarnerit nassuiarneqarput, taamaammallu taanna innersuussutigineqarpoq.

Siunnersuut tassungalu oqaaseqaatit innersuussutigalugit siunnersuut Inatsisartunut suliassanngortinneqarpoq.